

# Cabaran Pelaburan BCMA bermula

October 2, 2018

BANDAR SERI BEGAWAN, 1 Okt – Para peserta Cabaran Pelaburan Persatuan Pasaran Modal Brunei Darussalam (BCMA) boleh memulakan perdagangan 'dana' mereka untuk tempoh selama 19 hari.

Pertandingan yang disertai oleh 109 pasukan dari sembilan institusi pengajian tinggi itu dianjurkan oleh BCMA dengan kerjasama Autoriti Monetari Brunei Darussalam (AMBD) dan Progresif yang telah menyaksikan penganjuran Minggu Pelaburan Dunia 2018 sebagai inisiatif tahunan yang diketuai oleh AMBD selaku anggota Suruhanjaya Sekuriti Antarabangsa (IOSCO).

Antara institusi yang terlibat ialah Politeknik Brunei, Kolej IGS, Universiti Brunei Darussalam, Universiti Teknologi Brunei, Universiti Islam Sultan Sharif Ali (UNISSA), Kolej Perdagangan Laksamana, Institut Kemuda, Kolej Perdagangan dan Teknologi Cosmopolitan dan Institut Pendidikan Teknikal Brunei.

Bulan lalu, anggota BCMA telah mengadakan taklimat di kesemua institusi yang terlibat dengan menerangkan para pelajar mengenai pertandingan itu serta menunjukkan cara menjalankan pertandingan menerusi demonstrasi akaun perdagangan dan memberi ruang kepada para pelajar untuk bertanyakan soalan dan manfaat yang boleh diperolehi dengan menyertai pertandingan kali ini.

Dalam tempoh tiga minggu itu, para peserta turut layak untuk memenangi hadiah mingguan dan pada penghujung minggu, pasukan akan dinilai menerusi tiga aspek tertentu.

Hanya lima pasukan teratas daripada 10 pasukan yang memperoleh markah tertinggi akan berpeluang untuk membentangkan strategi mereka di hadapan para pengadil dalam memburu hadiah utama.

Menurut Pengurus Negara CIMB Investment Bank Berhad, Brian Wong, selaku setiausaha BCMA, pertandingan ini diharap akan menarik minat generasi muda bukan hanya dengan menghargai peluang dalam pasaran modal ketika menyertai pertandingan malah berpotensi untuk mendapat peluang dalam pasaran modal sebagai matlamat kerjaya mereka.

"Cabaran tahun ini merupakan pertandingan kali kedua yang dianjurkan oleh BCMA, yang telah menyaksikan pasukan dari UNISSA muncul sebagai pemenang pertandingan yang lalu

dan kami menjangkakan penyertaan dan pertandingan tahun ini lebih sengit lagi,” kata Brian Wong lagi.



Para pelajar yang terlibat mendengar taklimat yang disampaikan oleh salah seorang anggota BCMA.